



## 同鳥做朋友

僱有一細搭田，成田地，係吾屋家个百果園，想愛食麼个斯種麼个，講也奇，僱濫糝種佢，這兜天生天養个樹也儘儘採採斯打分僱加減有好食。當初時會買這埕地，本來係想，放寮日，細人有無共樣个所在好停動，畜个兩隻狗也有好走下咧，無斯人客、朋友來，有一個恬靜个所在好坐寮、泡茶打嘴鼓。所以，上手劉先生進前打個紅毛泥斯無同佢撬撇，本本留緊，伸著無打紅毛泥个所在，斯喊人載泥來屯，整界平，上背斯種兜松樹、櫻花、桂花這兜毋使麼个人工來照顧个樹，面頂過種兜地毯草，看起來歸片青青，試著有靚斯好。

「半夜想个千條路，天光本本賣豆腐」，原旦个規畫係想，恁泥呢闊闊有鋪平个青斯好，毋過，人心不足，看著別儕種个水果有好收成，斯會想：「僱也有地啊！也使得來種哦！」斯一頭杌、兩頭樣…，恁呢緊買緊種，舞到這下，除撇原旦種个松樹、櫻花、桂花以外，還有梅樹一頭、土槎兩頭、仙桃、甜桃、桑垂、無籽杌，還過樹葡萄五頭，紅羅花色，田項不管時都鬧借借。來坐寮个親戚朋友看著種種拏恁多東西，拂頭以外，還會講：「種恁多無共款个東西哦，你會做死哪～！」

日視日，正經有影，當有事頭好做，除撇間日斯愛去田項淋水、逐個月愛落肥以外，該草啊，毋係放佢生斯好，無管佢，成個月斯到腳膝頭恁高，若係又畀堵著落一陣雨，該草啊長去硬硬斯園老虎得哦！請人來劉草，一工人兩千五，盡無一個月愛割一到，時間一久，也係一筆得人驚个開銷。想啊想正經毋會和，斯牙根嚙緊自家來劉好咧。

買著一臺劉草機，用牛筋索來掃，正知，田項个事無恁該喔哦！牛筋索一掃落去，草尾掃斯掃著咧，毋過草莖原本好好，愛過劉第二到，無斯劉下忒貼，險險劊著進前種个草；啊無斯掃著脣項个樹頭，害僱緊同佢會失禮。毋過啊！一回生，兩回熟，三回燒癩癩，本來揸去腰拑背吊，汗流去歸身潦潦又瘦軟疾，仰脣都揸毋會順手个揸式劉草機，這下加真熟絡咧，不管係石頭縫、樹頭脣，總下劉去素絲素絲，平平个所在過還較毋使講，毋知个人還話講係請專業个人來劉个咧！

毋過，愛做一個耕種人毋係單淨會劉草斯好哦，還愛知逐種農作个處理方式，比論講：哪時愛落肥？落麼个肥？麼个時節愛做麼个事情？逐種水果開花、打子个時間都無共樣。有一擺，吾杌樹明明都恁壯旺，杌葉發到歸樹青溜溜，做麼無打半粒好食？實在真想無！？問人正知講：葉忒旺都無麼會打子，愛同佢修剪兜，分佢好開花，有開花正

有子好打啊！

還過有一到，佢嫌土樣忒高，另次擺歪摘，斯擎鋸來同佢鋸較矮兜，隔壁林鄰看著斯緊笑講：「若這兜讀書人咧～！拿來濫糝鋸，你同佢鋸恁短毋會開花，你明年無樣好食咧！」哼！騙佢毋識！春天一到樣樹斯會綻新芽！吾樣逐年都打去結～結結，甜又香，又大嫻粒，哪會無樣好食！？佢聽你在唱曲！

春天到咧，也暴芽咧，心肝肚還緊想：「你看！綻新芽咧呵！過講佢無樣好食啦！」嗯～！奇怪！翻轉年，到樣愛開花个時節，該花做麼開去郎郎律律？大嫻頭、有一棧樓恁高个樣樹打著八粒樣忒等。正信講林鄰講个無毋著哦！

人講：「地愛日日掃，田愛日日到。」到這下，土地買來七、八年咧，這七、八中間，逐日一到下班時節，都會想愛到田項遶遶咧、巡下咧，無薊草也在該摸摸搥搥；掃地泥、剪樹極，巡下有樹葉面頂个難毛蟲，用細竹枝挑起來，同佢請請去外背草埔去；看著樹頂吊个水果有好大粒咧，斯愛遽遽拿來包，若無，分蜂叮撒斯打爽咧；無斯落兜肥分樹好快快大。同事成半下會笑佢拿錢買事來做，毋過，又毋係種來愛賣錢个，耕種个趣味同心色，係厥等體會毋著个。

雖然薊草又恁又瘰，毋過薊草該滿，歸陣个紅鶯鶯、白頭傑、瓦雀，像講好个樣，言前言斯停在田脣个電線、牆頭、樹極面頂，等草一薊啊開，歸陣斯相爭擘啦肱飛落來尋原旦困在草竇肚个蟲，也毋會驚人半屑。草薊好，坐在梅樹下个大石牯面頂，看這兜來邇食个細人客在該位絡食，看厥等這位蹶下、該位爪下，長在還會為著相爭一尾蟲打去 gia`gia`滾；食飽咧，還會尋一枝自家中意个樹極來 si`翼順續啄目睡。坐在梅樹下，涼風一陣一陣吹來，鼻著正割開香香个青草味緒，目珠看著个係大自然提供个盡好个影片，這種光景，一般人曾有法度享受著！

這滿，祭日去田項，係吾屋家家庭日个活動。因為種个農作大體係自家愛食个，田項又長在有人客來坐、細人在該走祭，所以園項無洗農藥也無落化學肥，分佢自然大，水果有包著人斯有好食，無包著个，斯請該兜無家無竇个蟲同鳥去食咧。所以，時節一到，揚尾滿天飛，細人在田項拈揚尾、捉山狗太、無斯甥來搞。到寒天，這兜蟲園都無半隻咧，斯在紅毛泥上背騎鐵馬、同狗走相逐。問厥等愛遶百貨公司無！厥等應講：「這位比百貨公司好搞一百倍咧！」親戚朋友也合意來坐祭，春天來，看青溜溜个草地；秋天來；鼻桂花送來个清香、欣賞歸樹紅紅个楓樹；寒天來，也看得著梅樹綻放歸樹个花。尤其係寒天有出日頭个下晝頭，燒暖个日頭炯緊，三五個好朋友坐在梅樹下个石牯面頂，兜緊一杯燒茶，天南地北斯搭起來。一陣風吹來，梅花个花瓣，跌落茶杯肚、頭那項，起身離開，還帶走一身个清香。

這下，田項个果子大體有好收成咧！雖然一種水果種著一頭、兩頭，自家屋家人罈食忒等，毋過啊總係有一屑展風神个意思。若在田項有摘果子，轉到屋家自家留著幾粒，伸个斯一粒、兩粒拿去送分鄰舍朋友。鄰舍朋友知吾水果無洗藥、真天然又安全，雖然生來歪看相，毋過大體真受歡迎。

在這搭土地上背，偃同大自然學著包容萬物个開闊胸懷；同耕種人學著行行出狀元个謙卑態度。人講：「有土正有財」。買著這搭地了後，到這下斯旨有看著有發麼个財，毋過偃自家心肝肚知，雖然有形个「財」無看著，毋過因為逐日有好在這搭土地上背摸摸搥搥、運動流汗，除撇賺幾粒水果好食以外，也賺著身體个康健；屋家人在這位休閒、遊寮，做共款个事情、有共款个話題好講。這土地親像紙鷗个線，牽牽纏纏，同屋家人个感情越揪越俚…，這兜，係比有形个錢財過較有價值个財富。



### 作者感言

**張瑞玲** 臺中市東勢國小教師

首先，愛勞瀝「閩客語文學獎」，分偃有機會用自家个話寫自家个生活。也勞瀝滋養偃个大地萬物，分偃有創作个動機同內容。

往擺，總係用客話替學生修改比賽演講稿。別儕个事情、別儕个心情，寫來總感覺著寫無落心肝肚。這到，使得用盡熟絡个語言，寫自家个生活、自家个感覺，有一種講毋出親切个感覺。

得獎，係鼓勵、也督促偃煞猛向前，勞瀝評審先生个牽成同鼓勵。